

Toshkanov Nurbek Bahriddinovich

*TDYU tayanch doktoranti,
TDYU qoshidagi akademik litsey katta o'qituvchisi*

**SANOAT KOOPERATSIYASI – INTELLEKTUAL MULKNI
TIJORATLASHTIRISH USULI SIFATIDA**

Toshkanov Nurbek Bahriddinovich

*PhD student of TSUL, Senior lecturer at the Academic Lyceum
of the Tashkent State University*

**INDUSTRIAL COOPERATION AS A METHOD OF TRADE IN
INTELLECTUAL PROPERTY**

Тошканов Нурбек Бахриддинович

*Докторанты ТГЮУ,
Старший преподаватель Академического лицея Ташкентского
государственного университета.*

**ПРОМЫШЛЕННАЯ КООПЕРАЦИЯ КАК СПОСОБ ТОРГОВЛИ
ИНТЕЛЛЕКТУАЛЬНОЙ СОБСТВЕННОСТЬЮ**

**Саноат кооперацияси – интеллектуал мулкни
тижоратлаштириш усули сифатида**

Аннотация. Бугунги кунда интеллектуал мулк объектларини белгиланган тартибда муҳофазага олиш ва тижоратлаштириш ҳар томонлама долзарб аҳамият касб этади. Шундан келиб чиққан ҳолда юртимизда интеллектуал мулк тизимини ҳар томонлама ислоҳ қилиш, унинг ҳуқуқий муҳофазасини таъминлаш ва тижоратлаштиришга қаратилган салмоқли ишлар амалга оширилиб келинмоқда. Олиб борилаётган самарали ва салмоқли ишларга қарамасдан интеллектуал мулк объектларини тижоратлаштириш ва уларнинг яратилишини хусусий сектор томонидан молиялаштириш даражаси юртимизда пастлигича қолмоқда. Муаллиф шу ва шу каби бошқа муаммоларга ечим топиш мақсадида интеллектуал мулк объектларини тижоратлаштириш усулларида бири бўлган саноат кооперацияси (стратегик альянс)ни ташкил этиш ва фаолиятини ташкилий-ҳуқуқий ҳамда фуқаролик ҳуқуқий асосларини таҳлил қилган.

Юртимизда мазкур кооперация тури фаолияти қандай йўлга қўйилаётганлиги юзасидан ҳам амалий мисол келтириб ўтилган. Муаллиф миллий ва хорижий олимларнинг илмий-назарий қарашлари, миллий ва хорижий давлатларнинг амалий тажрибасига асосланган ҳолда тегишли хулосаларга келган ҳамда уларни асослаб ўтган. Мақола сўнгида миллий қонунчиликни такомиллаштириш юзасидан бир нечта умумий ва махсус таклифлар келтирилган бўлиб, мақолада келтирилган фикрлардан амалдаги фуқаролик қонунчилигини такомиллаштиришда фойдаланиш бўлган.

Калит сўзлар. *Кооперация, саноат кооперацияси, стратегик альянс, кластер, R&D*

Аннотация. Сегодня крайне важно сохранить объекты интеллектуальной собственности и коммерциализировать эти объекты. Для этих целей Узбекистан намерен провести обширные сложные процедуры, в частности, перерегулировать законодательство об интеллектуальной собственности и обеспечить ее защиту и коммерциализацию. Несмотря на эти усилия, финансирование объектов интеллектуальной собственности частными компаниями остается относительно низким. В связи с этим автор проанализировал новую форму сотрудничества — стратегический союз или производственную кооперацию для преодоления этих проблем. На нескольких примерах показано, как сегодня в Узбекистане действует создание стратегического альянса. На основе отечественной и зарубежной практики и теоретических разработок ученых делаются некоторые обоснованные выводы. Кроме того, автор вносит ряд изменений и дополнений в действующее гражданское законодательство с целью улучшения механизмов работы нового проекта.

Ключевые слова: *Кооперация, промышленная кооперация, стратегический альянс, кластер, R&D*

Abstract. Today it is quintessential to preserve the objects of intellectual property and to commercialise those objects. For those purposes, Uzbekistan aiming to undertake vast complex procedures particularly re-regulate intellectual property legislation and assuring its protection and commercialization. Despite of those efforts financing intellectual property objects by private companies remains relatively low. In these regard, author analyzed a new form of cooperation — strategic alliance or industrial cooperation in order to overcome those issues. It is showed that how creating strategic alliance has been operating today in Uzbekistan with several examples. On the basis of national and international practice and theoretical contributions of scholars makes some grounded conclusions. Moreover, author provides several amendments

and supplements current civil-legislation in order improve operational mechanisms of the new project.

Key words: *Cooperation, industrial cooperation, strategic alliance, cluster and R&D*

Кооперациялар ривожланган давлатларда иқтисодиётни ривожлантирувчи омилга айланганига анча йиллар бўлди. Мазкур турдаги юридик шахслар иқтисодиёт тармоқларининг турли соҳаларида фаолият юритиб келмоқда. А.Сафарованинг таъкидлашича, кооперация бу – қонуний умумижтимоий ёки иқтисодий мақсадга эришиш учун ихтиёрий равишда бирлашган, талаб қилинадиган капиталга тенг улушларни қўшган ва таваккалчилик ва фойдаларнинг адолатли улушини қабул қилган, умумий қабул қилинган кооперация тамойилларига мувофиқ иш олиб борувчи шахсларнинг белгиланган тартибда рўйхатдан ўтган бирлашмаси бўлиб, бугунги кунда дунё давлатларида кооперацияларга ижтимоий-иқтисодий ривожланиш омили сифатида қаралади¹. 1991 йил 14 июнда қабул қилинган Ўзбекистон Республикасининг «Кооперация тўғрисида»ги 295-ХII-сон Қонуни 1-моддасида эса «Ўзбекистон Республикасида кооперация жисмоний ва юридик шахсларнинг иқтисодий ҳамда ижтимоий фаолиятнинг турли соҳаларида умумий мақсадларга эришиш учун ташкилий жиҳатдан расмийлаштирилган, мулкнинг ширкат (жамоа) шаклига асосланган ихтиёрий бирлашмаларидан (кооперативларидан) иборат»² эканлиги кўрсатиб ўтилган.

Қонун қабул қилинганига 30 йилдан ортиқ вақт ўтган бўлиб, унинг ўша давр заруратидан келиб чиққан ҳолда, асосан, қишлоқ хўжалиги, коммунал хўжалик ва хунармандчилик каби соҳалар учун мўлжаллаб қабул қилинганлиги сабабли ўзида бугунги кун бозор муносабатлари талабларини акс эттирмайди.

Сўнгги йилларда олиб борилган ислохотлар, бозор муносабатларининг иқтисодиётда янада чуқурроқ ифода топиши натижасида кооперацияларнинг иқтисодиётдаги улуши кенгайди ва аҳамияти ортди. Мазкур турдаги иқтисодиёт субъектларининг асосий қисми қишлоқ хўжалигида фаолият юритаётганига гувоҳ бўлишимиз мумкин. Кластерлар ҳам корхона ва бошқа тадбиркорлик субъектларининг кооперациялашувининг яққол мисоли ҳисобланади.

Ҳозирги кунда дунёнинг кўплаб мамлакатлари турли тармоқларида кластерлар фаолияти йўлга қўйилган. Масалан, Россия Федерациясида тегишли

¹ А.Сафарова. Кооперация соҳасида қонунчиликни такомиллаштириш зарурати. *Huquq va burch*, 9/2021, 26-бет.

² 1991 йил 14 июнда қабул қилинган Ўзбекистон Республикасининг «Кооперация тўғрисида»ги 295-ХII-сон Қонуни. Қонунчилик маълумотлари миллий базаси, 21.04.2021 й., 03/21/683/0375-сон

давлат тузилмалари 2011 йилда ҳукумат топшириғига кўра жамоавий уйғунлашув асосида ҳудудий инновацион кластерларни ривожлантириш дастурига киритиш учун лойиҳаларнинг икки босқичли танловини ўтказган. Давлат ва ҳўжалик органлари, етакчи фан ва олий таълим муассасалари ҳамда бизнес жамоатчилигининг 100 дан ортиқ мутахассисларини жамлаган махсус ишчи гуруҳ лойиҳаларни саралашга жалб этилган. Натижада давлат томонидан кўллаб-қувватланган, жаҳонда рақобатбардош, ўзида илмий-тадқиқот ва таълим салоҳиятини мужассамлаштирган, ишлаб чиқариш самарадорлиги юқорилиги билан ажралиб турадиган, мулкчилик туридан қатъий назар соҳадош кичик корхоналарнинг кооперациялашувини таъминлаган (биринчи босқичда 37 та, иккинчи босқичда 25 та) ҳудудий кластер лойиҳаларини жорий этилишига эришиб, ҳудудларнинг тезкор юксалишига замин яратган¹.

Экспертлар ҳисоб-китобларига кўра, бугунги кунда дунёдаги илғор давлатлар иқтисодиётининг қарийб 50 фоизи кластер усулига ўтган. Масалан, Европа Иттифоқида 2 мингдан зиёд кластерлар мавжуд бўлиб, уларда ишчи кучининг 38 фоизи қамраб олинган. Дания, Финляндия, Норвегия, Швеция саноатида тўлиқ кластер усули татбиқ қилинган. АҚШда эса мамлакатдаги мавжуд корхоналарнинг ярмидан зиёди шу тизимда ишлаб, улар томонидан тайёрланаётган товарлар ялпи ички маҳсулотнинг 60 фоизини ташкил қилади.

Буни қарангки, уларнинг энг машҳури сизу бизга таниш бўлган “Силикон водийси”дир. 87 мингта компания, 40 та тадқиқот маркази ва ўнлаб университетлар фаолият юритадиган мазкур инновацион кластер инфратузилмасига 180 та венчур фирмаси, 47 та инвестиция ва 700 та тижорат банки хизмат кўрсатиб келади².

Мазкур ҳолат бутун жаҳон учун инновациялар ватанига айланган Силикон водийсида ҳам интеллектуал мулк объектларини яратиш бўйича кластер тизими, яъни кооперациялашган тизим амал қилишини кўрсатади. Шундан келиб чиқиб, қўшма корхоналар ёки стратегик альянслар шаклидаги саноат кооперацияларининг интеллектуал мулк объектларини тижоратлаштиришдаги ўрни юқори эканлигини англаш мумкин.

Л.М.Куприянованинг фикрича, саноат (ишлаб чиқариш) кооперацияси мазмунига кўра интеллектуал мулк объектларига бўлган ҳуқуқларни қўшма корхона доирасида ўтказишдан иборат. Асосий функцияси тадбиркорлик таваккалчилиги ва ишлаб чиқаришдаги узилишларни минимум даражасига

¹ Ф.Рахимов, Б.Усманов, Х.Кушиев. Кластер назарияси ва унга амалий ёндашувлар. <http://mineconomy.uz/uploads/%D0%9A%D0%9B%D0%90%D0%A1%D0%A2%D0%95%D0%A0%202020.pdf>

² С.Махсумов. Кластер – рақобатда ютиб чиқишнинг энг оқилона йўли. <https://xs.uz/uzkr/post/klaster-raqobatda-yutib-chiqishning-eng-oqilona-joli>

тушириш ҳисобланади. Афзалликлари янги бозорларга чиқиш имкониятининг пайдо бўлиши ва бозорда жорий қилиш харажатларининг камайишида намоён бўлади¹.

Н.А.Тихоновнинг таъкидлашича, тадқиқотдан то заҳиралар таъминоти, савдо ва ундан кейинги хизмат кўрсатишгача тўла-тўқис қамраб олинган, ишлаб чиқаришнинг барча босқичларини бирлаштирган, маълум маҳсулот яратишда қатнашувчи корхона ва ташкилотларнинг вертикал технологик тизимидаги жамланмасига саноат кооперацияси дейилади².

Гарчи жаҳонда интеллектуал мулк объектларини тижоратлаштиришда саноат кооперацияси салмоқли ўрин эгалласада, унинг бой тажрибаси ўзбек иқтисодчи ва ҳуқуқшунос олимлари томонидан чуқур ўрганилаётганига кўп бўлмади. Ўзбек ҳуқуқшунос олимларидан Б.Ходжаев саноат кооперациясига интенсив технологик алмашинуви таъминлайдиган технологияларни тижоратлаштириш шакли сифатида таъриф беради³.

Саноат кооперацияси шаклида технологияларни, яъни интеллектуал мулк объектларини тижоратлаштириш борасида ишлаб чиқариш кооперацияси тўғрисида келишув тузилади. Мазкур келишув доирасида маҳсулотларни тўғридан-тўғри ёки ўзаро етказиб бериш (сотиш ва сотиб олиш) ёки хизматлар кўрсатишдан ташқари тарафлар ўртасида ўзаро қўшимча фойда олишга қаратилган узоқ муддатли ҳамкорлик амалга оширилади. Кооперация келишуви куйидаги сабабларга кўра тузилади:

- 1) техник билим (кўникма)ларни эгаллаш ва тақсимлаш;
- 2) ишлаб чиқариш ва меҳнат ресурсларидан фойдаланиш учун қулай шароитларни излаш;
- 3) ишлаб чиқариш миқдори ва ихтисослашувини ошириш;
- 4) маҳсулот етказиб бериш учун янги бозорларни қидириб топиш;
- 5) ишлаб чиқариш харажатларини камайитириш ва ҳ.к.

Ривожланган хорижий мамлакатларда саноат кооперациялари қўшма корхоналар ва стратегик альянслар шаклида ташкил қилинади. Қўшма корхоналар ва стратегик альянсларни ташкил этиш интеллектуал мулк ҳуқуқини бошқа шахсларга ўтказиб бериш билан бирга бундай ҳуқуқлардан мустақил фойдаланишни сақлаб қолиш имконини берувчи йўллардан бири ҳисобланади. Бунда технологиялар биргаликда яратилади ва биргаликда тасарруф этилади.

¹ Куприянова Л. М. Эффективная модель коммерциализации интеллектуальной собственности. Мир новой экономики. 2019; 13(1), Стр. 106. DOI: 10.26794/2220-6469-2019-13-1-104-110

² Тихонов Н.А. Эффективность способов коммерциализации инноваций / Н.А.Тихонов // Управление экономическими системами – 2012 - №4 – С.104.

³ Интеллектуал фаолият натижаларини тижоратлаштириш ва баҳолаш: услубий қўлланма/ Б.Ходжаев ва бошқалар. – Т.: “LESSON PRESS”, 2021 й. – 34-бет

Саноат кооперацияларида бўлгани каби биргаликда ишлаб чиқаришни ташкил этиш икки ёки ундан ортиқ мустақил корхоналар кооперациясини назарда тутди, бунда:

- илмий-техник ишланмалар эгаси интеллектуал фаолият натижаларига нисбатан мулкрий ҳуқуқни сақлаб қолган ҳолда уларни бепул ишлаб чиқиш имконига эга бўлади;
- технологияни топширган тараф интеллектуал фаолият натижасини тижоратлаштиришдан келадиган ҳар қандай даромадни олишда иштирок этади;
- қўшма корхона тузилаётганда технологияга эгаси технологияни янги ташкил этилаётган корхона устав капиталига улуш сифатида ўтказиб беради¹.

Мутлақ ҳуқуқлардан тижоратда фойдаланишнинг усулларида яна бири *тижорат альянси* бўлиб, бунда мустақил корхоналар интеллектуал фаолият натижаларини тижоратлаштиришда иқтисодий ҳамкорликда фаолият олиб борадилар. Яъни тижорат альянсида тадбиркорлик субъектлари ўзаро фойдалилик асосида интеллектуал фаолият натижаларини тижоратлаштириш йўлида иқтисодий алоқаларини ўрнатган ҳолда бозорда ўзларининг ўринларини мустаҳкамлашга эришадилар.

Айрим америкалик олимлар *стратегик альянс* тушунчасига “фирмалар ўртасидаги оддий савдо операциялари доирасидан ташқарига чиқувчи, аммо фирмаларнинг бирлашувига олиб келмайдиган узоқ муддатли келишувлар” сифатида таъриф берганлар.² Бироқ амалда мазкур таъриф альянснинг иқтисодий моҳиятини тўлиқ очиб бермайди.

Биринчи навбатда, стратегик альянс – бу ресурсларни бирлаштириш ҳисобига тижорат мақсадларига эришиш учун икки ёки ундан ортиқ фирмаларнинг кооперацияси бўлиб, бунда фирмалар ўзларининг юридик мустақиллигини сақлаб қоладилар. Жаҳон амалиётида кўплаб илмий-техник альянсларга мисоллар мавжуд, масалан, 2010 йилда Toyota ва Tesla компаниялари Tesla электродвигателлари билан жиҳозланган Toyota RAV4 электромобилларини ишлаб чиқиш учун стратегик альянс ташкил этганлар. Toshiba компанияси Motorola, IBM, Siemens, Ericson ва Time Warner каби компаниялар билан биргаликда иш олиб борган³. Шунингдек, улар биргаликда иш олиб бориш билан бирга қайсидир фаолият соҳасида ўзаро рақобатга

¹ Intellectual Property Commercialization: Policy Options and Practical Instruments. United Nations, Geneva (Switzerland), 2011. <https://unece.org/fileadmin/DAM/ceci/publications/ip.pdf>

² Портер М. Международная конкуренция: Пер. с англ./Под ред. и с предисловием В. Д. Щетинина. – М.: Международные отношения, 1993, 86 с.

³ Д.М.Дмитриева. Стратегические альянсы как форма международного экономического сотрудничества. Автореферат диссертации на соискание ученой степени кандидата экономических наук. Санкт-Петербург – 2014. Стр. 10

киришиши ҳам мумкин. Бу бўйича мисолларни қуйидаги жадвалда кўришингиз мумкин:

1-жадвал¹

Альянс	Ҳамкорлик соҳаси	Рақобат соҳаси
Xerox ва Fuji Xerox	- Нусха кўчириш технологияларини яратиш; - АҚШ ва Осиё минтақасида нусха кўчириш техникаси маркетинги; - Принтер технологиялари ва принтерларнинг глобал савдоси	- Алоҳида нусха кўчириш технологиялари; - Алоҳида компонентларни ишлаб чиқариш
Honeywell ва Yamatake-Honeywell	- Назорат қилиш технологияларини тадқиқ қилиш ва ишлаб чиқиш; - Японияда назорат қилиш технологиялари савдосини кенгайтириш	Осиёнинг айрим мамлакатларида маркетинг
Hewlett-Packard ва Yokogawa-HP	- Японияда компьютерлар савдоси; - Яримўтказгичлар назорати учун ускуналарни ишлаб чиқиш ва тадқиқ қилиш	-
Fujitsu и Amdahl	- Биргаликда ишлаб чиқилган ишланмаларнинг АҚШдаги савдоси; - Универсал компьютер технологияларини ривожлантириш	Ишлаб чиқариладиган маҳсулотнинг бўлиниши
IBM ва Toshiba	- Япалоқ (плоск) экранларни тадқиқ қилиш ва яратиш; - Япалоқ экранларни ишлаб чиқариш	Ноутбуклар савдоси
Sun ва Fujitsu	- Микропроцессорларни тадқиқ қилиш ва яратиш; - Компьютер технологиялари (SPARC архитектурасини ишлаб чиқиш;	- Микропроцессорларни ишлаб чиқариш; - Японияда ишчи станциялар савдоси
Hewlett-Packard ва Apple	- Микропроцессорларни тадқиқ қилиш ва яратиш; - Технологияларни ўтказиб бериш (трансфер)	- Микропроцессорларни ишлаб чиқариш; - Японияда ишчи станциялар савдоси
IBM ва Apple	Компьютер технологиялари (PowerPC архитектураси)	Компьютерлар ва операцион тизимлар савдоси
IBM ва Motorola	- Компьютер технологиялари (PowerPC архитектураси); - Микропроцессорларни тадқиқ қилиш ва яратиш	Микропроцессорларни ишлаб чиқариш ва сотиш

R&D (Research and Development, янги маҳсулот ёки тизимни саноатда ишлаб чиқаришдан олдин, яъни илмий тадқиқотлар доирасига кириб кетувчи прототиплар ва кичик ҳажмдаги маҳсулот намуналарини ишлаб чиқаришни ўз

¹ А.Бабина. Международные стратегические альянсы. Банкаўскі веснік, Кастрычнік, 2007. Стр. 46

ичига олган ишлар мажмуи¹⁾ соҳасида стратегик альянс ўзига хос ноёб лойиҳаларни амалга оширишда, инвестицион лойиҳаларда таваккалчиликни камайтиришда рақобатчиларнинг илмий-техник салоҳиятини бирлаштиришга имкон яратади, бироқ компания ноу-хау билан ишлайдиган бўлса, интеллектуал мулк ҳуқуқининг бузилиши хавфи доимо мавжуд бўлади.

Иккинчидан, бундай стратегик альянсларда иштирок этиш, албатта, эришилган натижаларни ҳамкорликда ривожлантириш учун яхши йўл ҳисобланади, бироқ ушбу ҳамкорликни қўллаб-қувватлаш тегишли ресурс ва харажатларни талаб қилади. Қолаверса, стратегик шерикнинг кейинчалик ҳамкорлик қилишдан бош тортиши сарфланган ресурсларни йўқотиш хавфини келтириб чиқариши мумкин.

Тадбиркорлик субъектлари ҳамкорлигидаги стратегик альянс икки усулда амалга оширилиши кенг кузатилади: қарама-қарши лицензиялаш усули орқали ёки муайян интеллектуал мулк объектига (қўшма тадқиқотлар натижасида яратилган интеллектуал мулк объектига) нисбатан биргаликдаги ҳуқуқларни расмийлаштириш (бошқариш) орқали амалга оширилади.

Стратегик альянс доирасида кўпинча *қарама-қарши лицензия (кросс лицензия)* механизми қўлланилади. Лицензиянинг ушбу тури лицензия шартномасини тузишда патент эгаларининг ҳуқуқларини ўзаро ўтказиб бериш, яъни шерикларнинг ҳар бирига тегишли интеллектуал мулк объектларидан ўзаро фойдаланишга рухсат беришни назарда тутди. Бундай лицензиялар амалда ҳамкор шериклар бир-бирларининг ҳуқуқларини бузмасдан ўз фаолиятини амалга ошира олмайдиган тақдирда қўлланилишини кузатиш мумкин.

Содда қилиб айтганда, саноат кооперациялари ҳам, стратегик альянслар ҳам интеллектуал мулк объектларини тижоратлаштиришда лицензиявий муносабатларнинг бир тури ҳисобланади.

Хулоса ўрнида шуни айтишимиз мумкинки, кооперациялар нафақат қишлоқ хўжалиги, саноат, туризм, балки иқтисодиётнинг деярли барча соҳаларида ривожлантирувчи омил бўлиб хизмат қилиши мумкин. Бу қуйидагиларда намоён бўлади:

1) Саноат кооперацияларини яратишда ихтирочи-новаторларнинг интеллектуал мулк объектига бўлган ҳуқуқлари сақланиб қолади. Бунинг натижасида ихтирочилар учун мазкур объектлардан доимий ва барқарор даромад олиб туриш имконияти вужудга келади;

2)

¹ И. Якубова. Интеллектуал мулк – инновацион ривожланишнинг зарурий омили. <https://yuz.uz/news/intellektual-mulk--innovatsion-rivojlanishning-zaruriy-omili->

3) Бизнесда аллақачон ўз ўрнига эга бўлган ва бозорда танилган тадбиркорлик субъектлари ўзларининг мустақилликларини сақлаб қолган ҳолда маълум бир иқтисодий мақсад йўлида бирлашадилар;

4) Саноат кооперациялари қўшма корхона шаклида ҳам ташкил қилиниши мумкин. Бундан, асосан, халқаро ишлаб чиқариш кооперациясини ташкил этишда кенг фойдаланилади;

5) Бозорда ўз ўрнига эга бўлган субъектларнинг ўзаро кооперация битимларини тузиши кооперацияни ташкил этишдан кўзланган мақсад муваффақиятсизликка учраши мумкинлиги хавфини камайтиради, айти пайтда, фойда олиш имкониятини оширади;

6) Саноат кооперациялари маҳсулотни амалга жорий этишнинг “тадқиқот – яратиш – ишлаб чиқариш – бозорга жорий қилиш” босқичлари узлуксизлиги ва узвийлигини таъминлашга хизмат қилади;

7) Саноат кооперациясида ўзаро рақобатда бўлган ёки рақобатда бўлмаганлигидан қатъи назар ҳар қандай компаниялар бирлашиши мумкин, чунки кооперациянинг ушбу турида ҳар икки тараф учун фойдали битим тузилади. Томонлар ундан бирдек манфаатдор бўладилар. Шу билан бирга, томонлар айрим соҳада ҳамкор, айрим соҳада эса рақобатчи бўлишлари ҳам мумкин.

Хулосаларда санаб ўтилган ҳолатлар бугунги кун ҳаётимизда қисман ўз ифодасини топмоқда. Масалан, Европа Иттифоқи томонидан молиялаштирилган, Германия Халқаро ҳамкорлик жамиятининг “Ўзбекистон қишлоқ ҳудудларини барқарор ривожлантириш” лойиҳаси ҳажмида Сирдарё вилояти Мирзаобод тумани Деҳқонобод маҳалласида “Деҳқонобод Асл Анори” ишлаб чиқариш кооперативи фаолияти йўлга қўйилган¹. Мазкур кооператив амалиётига “Маҳаллий анор (*Punica granatum* L.) навларининг физиологик-биокимёвий, фармакологик хусусиятлари ва микроклонлаш истиқболлари” мавзусида фан ва олий таълим илмий ютуқлари сингдирилган докторлик (PhD) диссертация натижалари вилоятида анорчилик агротехнологиясидан бошланиб, уни экспортга йўналтириш, шарбат ишлаб чиқариш ва иккиламчи чиқиндиларини чуқур қайта ишлаш билан боғлиқ барча жараёнларни ўзида мужассамлаштирадиган анорчилик кластерини шакллантириш имкониятини яратган. Бунда бевосита янги маҳсулот ёки тизимни саноатда ишлаб чиқаришдан олдин, яъни илмий тадқиқотлар доирасига кириб кетувчи прототиплар ва кичик

¹ Мирзаободда анордан табиий шарбат ишлаб чиқарадиган корхона иш бошлади.
<https://xs.uz/uzkr/post/mirzaobodda-anordan-tabii-j-sharbat-ishlab-chiqaradigan-korkhona-ish-boshladi>

ҳажмдаги маҳсулот намуналарини ишлаб чиқаришни ўз ичига олган ишлар мажмуи (R&D) тўлиғича амалга оширилган.

Юқорида келтириб ўтилган фикрлар ва хулосаларга кўра интеллектуал мулк объектларини тижоратлаштириш усуллари ҳамда улардан бири сифатида саноат кооперацияси (стратегик альянс)ни ташкил этиш ва амалга оширишнинг ҳуқуқий механизмларини янги таҳрирдаги Фуқаролик кодексида чуқурроқ баён этиш, кооперация тўғрисидаги қонунчиликни такомиллаштириш бўйича ишларни амалга ошириш мақсадга мувофиқ ҳисобланади. Шу билан бирга, кооперацияга оддий ширкат шартномаси элементлари мос тушишини инобатга олиб, мазкур шартнома тури бўйича фуқаролик қонунчилиги нормаларини такомиллаштириш зарур бўлади.

АДАБИЁТЛАР/СНОСКИ/REFERENCES:

1. А.Сафарова. Кооперация соҳасида қонунчиликни такомиллаштириш зарурати. *Huquq va burch*, 9/2021, 26-бет.
2. 1991 йил 14 июнда қабул қилинган Ўзбекистон Республикасининг «Кооперация тўғрисида»ги 295-ХП-сон Қонуни. Қонунчилик маълумотлари миллий базаси, 21.04.2021 й., 03/21/683/0375-сон
3. Ф.Рахимов, Б.Усманов, Х.Кушиев. Кластер назарияси ва унга амалий ёндашувлар.
<http://mineconomy.uz/uploads/%D0%9A%D0%9B%D0%90%D0%A1%D0%A2%D0%95%D0%A0%202020.pdf>
4. С.Махсумов. Кластер – рақобатда ютиб чиқишнинг энг оқилона йўли.
<https://xs.uz/uzkr/post/klaster-raqobatda-yutib-chiqishning-eng-oqilona-joli>
5. Куприянова Л. М. Эффективная модель коммерциализации интеллектуальной собственности. *Мир новой экономики*. 2019; 13(1), Стр. 106. DOI: 10.26794/2220-6469-2019-13-1-104-110
6. Тихонов Н.А. Эффективность способов коммерциализации инноваций / Н.А.Тихонов // *Управление экономическими системами* – 2012 - №4 – С.104.
7. Интеллектуал фаолият натижаларини тижоратлаштириш ва баҳолаш: услубий қўлланма/ Б.Ходжаев ва бошқалар. – Т.: “LESSON PRESS”, 2021 й. – 34-бет
8. Intellectual Property Commercialization: Policy Options and Practical Instruments. United Nations, Geneva (Switzerland), 2011.
<https://unece.org/fileadmin/DAM/ceci/publications/ip.pdf>
9. Портер М. Международная конкуренция: Пер. с англ./Под ред. и с предисловием В. Д. Щетинина. – М.: Международные отношения, 1993, 86 с.

10. Д.М.Дмитриева. Стратегические альянсы как форма международного экономического сотрудничества. Автореферат диссертации на соискание ученой степени кандидата экономических наук. Санкт-Петербург – 2014. Стр. 10

11. А.Бабина. Международные стратегические альянсы. Банкаўскі веснік, Кастрычнік, 2007. Стр. 46

12. И.Якубова. Интеллектуал мулк – инновацион ривожланишнинг зарурий омили. <https://yuz.uz/news/intellektual-mulk--innovatsion-rivojlanishning-zaruriy-omili->

13. Мирзаободда анордан табиий шарбат ишлаб чиқарадиган корхона иш бошлади. <https://xs.uz/uzkr/post/mirzaobodda-anordan-tabii-j-sharbat-ishlab-chiqaradigan-korkhona-ish-boshladi>